

欽定剿平粵匪方略

欽定剿平粵匪方略卷四十六 癸丑年

六月十六日 己丑 李德奏言 臣因賊自汜水過河

已調兵各處鎮守並派都司張遇祥管帶兵勇
各二百名都司武殿魁等酌帶官兵一千五百
名並未入流姚師烺練勇二百名均飭令馳赴
懷慶相機進剿一面咨會直豫在事諸臣各率
勁旅剋期進攻如此畛域不分四面截擊賊卽

多方詭詐無難盡絕根株至曹縣一帶亦屬緊
要業調厲恩官會同慶德嚴密巡防並與駐紮
濮州之將軍瑞昌互相策應此外均經分別布
置祇須各州縣訓練民勇拏辦土匪地方自能
安靜臣仍統率官軍親赴懷慶一帶會剿

同日王履謙長臻奏言探得賊匪圍攻懷郡勢
甚猖狂將城外所蓄沁水盡行放洩以期必得

懷郡臣等查懷郡東鄰衛輝由衛河入天津勢甚便捷因卽飛咨直隸督臣並札飭衛輝府知府景昌先期準備一面飛催各路統兵大員迅往懷郡救援臣等仍不時上下巡查並嚴飭府廳營弁晝夜嚴防藩司張集馨駐紮廟工布置尙爲周妥堪備不虞均奏入

上命軍機大臣傳諭李德曰該撫不分畛域親自督兵

出境會勦所辦甚合機宜其曹縣一帶已據札飭鎮道嚴密巡防瑞昌現駐濮州相離不遠聲勢自必聯絡該撫現已出境惟有探明賊蹤所在進兵攻擊所有渡河賊匪聞已竄至懷慶偏近澤州著卽會同統兵各大員四面截擊勿使竄入太行致成負隅之勢上又命軍機大臣傳諭王履謙長臻曰據李德奏統帶官兵親赴懷慶一帶會勦兵力不爲不厚惟該匪被

剿後難保不紛紛他竄著王履謙長臻嚴飭沿河地方文武認真堵截仍隨時於黃河上下游嚴密巡查船隻勿令賊匪踵至乘間偷渡

上又命軍機大臣傳諭訥爾經額恩華托明阿張集馨曰懷慶爲河北要地太行門戶素稱繁庶若任賊盤踞西竄澤潞踞險負隅勢將繞出直隸腹地且逼近衛輝若由衛河入天津勢甚便捷亦不可不急爲防

範該大臣前經派往之董占元等諒早趕到托明阿等統兵四千亦早渡河何以至今尙無進剿信息本日據李德奏統帶官兵親赴懷慶一帶會剿封疆大吏必應如此不分畛域現在恩華隨營兵一千餘名並該大臣續派之雙祿等此時計均趕赴懷郡兵力不爲不厚著恩華托明阿等卽會同李德督飭官兵與董占元等併力攻擊速解懷慶之圍萬不可任賊

分竄其衛河一帶爲入天津之路該大臣亦當設法
豫爲堵截張集馨駐紮廟工著卽相機妥爲布置

上又命軍機大臣傳諭勝保陸應穀曰據李德奏率兵
親赴懷慶協勦又據王履謙長臻奏賊匪圍偏懷慶
勢甚猖狂飛催各路官兵赴援各等語勝保行抵豫
境黃河以南賊匪情形諒已偵探明確著卽與陸應
穀迅籌勦辦何處緊急卽向何處進攻並嚴飭經文

岱柏山等併力合剿現在許州賊匪曾否殲除無論
河南河北勝保均應統籌賊勢先其所急聞洛陽鄉
圍現有萬餘人可斷絕逆匪西竄之路是否足資防
守並著查明具奏

又命軍機大臣傳諭舒興阿張祥河曰該匪攻圍懷
郡勢甚猖獗懷慶爲澤潞門戶儻有疏虞致令賊匪
西竄太行繞出直隸之後所關非細著舒興阿迅派

將弁帶兵二千名星夜催趨前進由潼關渡河直從山西一路迎頭截擊該督統兵由陝州一路進剿鞏縣一帶賊匪以斷偷渡之路並著張祥河於陝州蒲州水陸要隘處所加意嚴防

十八日辛卯勝保奏言臣接河南撫臣陸應穀函

逆賊分爲兩股一竄河北溫縣等處撲擾懷慶一由汜水竄回鄭州由新鄭石固南竄許州若

論賊勢輕重以河北爲要惟現在既有南竄之賊安可不迎頭截擊自應先辦河南再赴河北臣因由柘城可以改道太康扶溝直趨許州當卽督兵前進復密探賊蹤所在以期迎頭截擊初十日行抵扶溝探稱賊圍許州兩日經總兵柏山追擊獲勝現已南竄鄆城一帶臣計該逆分股窮竄已過鄆城相距二百餘里雖極力窮

追恐難繞前迎勦嗣復准撫臣陸應穀函稱現
已派前南陽鎮總兵王家琳帶兵一千二百名
追勦南竄之賊該撫亦卽日出省督勦臣查此
股賊匪爲數不過二三千人既有該撫追勦且
周家口及信陽州亦皆有防兵數百名駐守如
果實力尾追尙易勦辦臣一面飛咨湖廣總督
湖北提督嚴防襄陽樊城並照會南陽鎮設法

迎擊臣卽遵

言督帶兵勇北行於十一日馳抵汴梁省城外紮營知
照撫臣由滎澤河口飛調船隻前來日內當可
到齊以便渡黃現在探聞河北賊匪於六月初
三日圍犯懷慶並武陟等處該府望援甚急托
明阿等相距甚近此時諒當趕到臣擬於渡黃
後由陽武一帶直赴武陟懷慶等處探明賊衆

所在相機截勦以杜該逆東竄惟因天氣正值
盛暑兵丁晝夜步行不敢少休祇好加意慰勞
仍復催趨前進臣此次並無馬隊恐一接仗賊
或窮竄必須馬隊追趕抄擊已飛調西凌阿等
所帶黑龍江馬隊八百名由臣隨時調遣以便
追擊應手

同日陸應穀奏言接據許州知州金梁稟稱本

月初六日賊匪數千竄偃州城該州督率在城
員弁登陴固守開放槍礮斃賊多名該知州右
手背亦被槍傷正在指揮兵勇間賊又開放大
礮將東門城樓轟倒壓傷該知州頭面臂髀等
處時該知州之弟南河候補通判金業奉差到
許該知州令其照料嚴守一晝夜幸保無虞現
在城內兵力太單賊仍疊次攻圍危在旦夕臣

卽催前隊王家琳不分晝夜迅速赴援並准經
文岱咨稱初七日已抵密縣現在跟蹤追剿旋
又接柏山函會初八日帶兵馳至許州之八里
橋賊匪探知大兵環集初八日夜解圍由臨潁
縣一路南竄臣督令各兵趕緊進剿柏山由八
里橋行抵大石橋盤獲賊探二名詢悉賊蹤不
遠飭令將弁緊追初九日趕至鄆城縣王店地

方及賊尾隊該逆整隊拒敵我兵槍礮齊放奮
勇爭先傷斃黃巾賊二名紅衣賊三名復經遊
擊伊里綳阿督兵抄出賊前匪衆登時慌亂我
兵愈加猛勇殺斃賊百餘名該匪藏匿民房我
兵用火彈圍燒復生擒燒殺多名統計殺斃長
髮賊九十餘名短髮賊二百餘名燒死者不計
其數餘匪南竄柏山卽時督兵由西平縣一路

馳往窮追臣查賊匪由鞏縣竄出裹脅不少若不速加剿洗又恐沿途糾結柏山督兵跟追獲有勝仗臣復催西甯馬隊兼程前進與柏山會合並督同經文岱王家琳等或繞道截擊或跟蹤尾追務期一鼓蕩平均奏入

上命軍機大臣傳諭勝保曰現在許州圍解南竄之賊業經該撫飭令鎮將等帶兵追剿勝保督帶兵勇渡

河會勦懷慶一帶賊匪所辦尙合機宜此時恩華托
明阿李德等想已齊抵懷慶勝保正可會同攻擊四
路兇圍不但杜其北竄並不可任其西竄太行更滋
蔓延至所奏調撥西凌阿馬隊官兵八百名以便追
擊自應如此辦理我兵盛暑遄征殊堪軫念並著勝
保加意慰勞隨時激勵俾軍務速蒞同荷恩施

上又命軍機大臣傳諭陸應穀曰逆匪圍攻許州知州

金梁斃賊多名該匪聞大兵環集解圍南竄是賊攻
圍許州官兵雖經追及並未接仗輒卽逃竄柏山帶
兵尾追小有擒斬亦未痛加剿洗勝保因河北緊要
已渡河馳赴懷慶所有黃河以南賊匪責成陸應穀
剿辦著卽會同經文岱柏山等將由許州南竄各匪
迅速追剿或繞道截擊或設伏潛攻總期悉數殲擒
毋徒尾追塞責

陸應穀又奏言查汴梁爲省城重地五月十三日賊撲城下圍攻甚急其時臣帶兵在外代理藩司沈兆璽等督率文武官紳兵民義勇奮力抵禦槍礮齊施或固守城池或躬冒矢石或絕城蹈險或埽穴衝鋒俱能於呼吸存亡之頃屢挫兇燄至十七日賊匪被創紛逃重圍頓解得以轉危爲安謹擇其尤爲出力之文武員弁及

在事紳士覈實請獎以昭激勸奏入

上諭內閣曰逆匪竄撲開封省城經該地方文武官紳
登陴固守迅解重圍自應從優獎敘以爲守土者勸
加恩著照所請代理河南藩司山西臬司沈兆澣河
南臬司林揚祖署開歸陳許道張昀均著賞換花翎
張昀並著以道員遇缺補用彰衛懷道蔣啟敷著賞
戴花翎並賞加按察使銜候補道周熙徵著賞戴花

翎並交軍機處記名遇有該省道員缺出請旨簡放
署開封府知府賈臻著賞換花翎並開缺交軍機處
記名遇有道員缺出請旨簡放調署祥符縣知縣何
懷珍前已賞加同知銜著開缺以知府補用並賞戴
花翎開封府理事同知寶福知府銜歸德府通判李
開第東河分缺先用同知陳兆觀均著賞戴花翎東
河通判秦際隆著賞加同知銜並賞戴花翎開封府

同知羅景恬著以知府用其隨同守城之在籍紳士
前任直隸順德府丁憂知府張光第著賞戴花翎並
交軍機處記名以道員用前署山西澤州府丁憂同
知萬金墉著賞戴花翎並交軍機處記名以知府用

十九日 壬辰 訥爾經額奏言查大名鎮董占元帶

兵一千名行抵獲嘉距懷慶僅一百餘里雖因
賊匪衆多不能徑擣賊巢亦應前往懷慶附近

駐紮以壯聲援而分賊勢乃屯駐獲嘉數日之久經臣疊次嚴催輒以守候後起官兵爲詞查軍興以來每因將弁疲玩致誤事機相應請

旨將大名鎮總兵董占元先行交部議處以肅軍律現在雙祿帶兵計到懷郡臣子蘊秀於十三日到營十五日派令偕同伊綿阿管帶留駐磁州之營標兵三百名星夜馳往懷慶會合該鎮等卽

日進攻儻再遷延卽行分別嚴叅治罪至已調
未到兵尙有一千二百名臣現將已到磁州之
宣化兵五百名卽日親身管帶移營彰德餘俟
到齊留七百名駐守磁州派五百名赴彰德屯
駐該郡前距懷慶僅隔衛輝一府後距磁州祇
數十里地處適中於督勦事宜旣可就近調度
而直隸地方亦可兼顧署四川總督慧成奉

旨折回河北現在懷慶地方進剿官兵數已逾萬慧成
所帶之兵渡河北來似可留於衛輝一帶駐紮
豫防賊匪潰竄迎剿截擊至署河北鎮總兵花
里雅遜布經臣留駐延津渡口以爲董占元後
路策應兼資防河俟慧成到日卽令隨同防剿
奏入

上命軍機大臣傳諭訥爾經額曰賊匪攻撲懷慶已經

旬日各路進剿官兵馳抵河北者不下萬餘亟應迅速會剿該大臣現已馳赴彰德居中調度並派蘊秀伊綿阿等馳往會同鎮將等卽日進攻自應如此辦理著卽知照恩華托明阿等督飭帶兵各員迅速進剿據奏擬令慧成駐紮衛輝以防賊匪潰竄現在慧成行抵何處著卽飛催遄行毋稍遲延該大臣如須督兵前進仍著隨時酌度軍務情形旦夕不同萬不

可延緩貽誤

上諭內閣曰大名鎮總兵董占元經訥爾經額派令督帶官兵前往豫省迎勦乃行至獲嘉縣地方經該大臣疊次嚴催輒以守候後起官兵爲詞似此疲玩遷延殊屬可惡董占元著摘去頂戴先行交部議處儻再不知愧奮卽著從嚴叅辦

二十日 癸巳 訥爾經額托明阿奏言 臣托明阿會

同提督善祿都統西凌阿馳抵懷慶督兵分三路進剿探知賊匪約有三四千名攻打府城其沁河隄北約一千餘賊設有木壘遙作聲勢一見我兵該逆亦分三路由東南北三面城廂繞出抗拒我兵奮勇前進施放連環槍礮迎擊賊來撲營數次均被馬步各兵殺退約斃賊匪七八百名其沁河隄北之賊亦被我軍擊斃二百

餘名該逆支持不住退避城廂藏匿因城廂窄隘且探明設有大礮埋伏未便輕進隨卽回營是日共計殺賊一千餘名內有黃巾黃袍賊目二名前執春正令旗賊一名據生擒賊供卽係賊首僞丞相吉汝元該逆現於四關散駐未來攻城是懷慶城內聲息已通臣托明阿與善祿商定於十七日自東南兩關會合各路官兵往

西攻勦並照會總兵董占元雙祿由北路勦擊
臣訥爾經額飛咨尙書恩華督兵接應並飭花
里雅遜布等在於扼要渡口隘口嚴密攔截以
防潰竄奏入

上諭曰渡河逆匪受此勦戮事機庶可挽回朕泣感
天恩深厚嘉爾諸將士奮勇當先然此時朕不敢稍萌
輕易之心訥爾經額等尤不可略存大意畿輔安危

實天下安危所繫卿等其鼓勵軍心以期埽數殲滅
上命軍機大臣傳諭訥爾經額恩華托明阿曰逆匪渡
河圍攻懷慶經托明阿等分路進剿賊匪旣大受懲
創逆首又被殲斃賊已望風膽落惟賊情詭譎飄忽
靡常難保不窮蹙他竄現於懷慶四關散駐恩華由
衛輝前進諒早趕到李德已帶兵親往會剿勝保亦
帶兵渡河此時大兵雲集托明阿等於十七日由府

城東南兩關往西攻勦董占元等由北路進擊想已與各路官兵四面兜圍務期聚而殲旃勿任竄逸不惟北路一帶宜加意嚴防亦斷不可令其西竄太行再致蔓延

上諭內閣曰此次賊撲懷慶府城該城文武官員尙能登陴擊賊殲厥渠魁大挫賊鋒甚屬可嘉現在托明阿善祿董占元雙祿等分兵三路夾擊誦爾經額已

飭署河北鎮總兵花里雅遜布等在扼要隘口攔截
防其奔竄恩華勝保李德卽日趕到正可督兵接應
四面兜擒該大臣等不可以已獲勝仗稍存大意其
各鼓勵軍心迅速蒞功同膺懋賞

同日張芾奏言查賊於城北得勝門外暗挖地
道經臬司江忠源在城內加築月城由章江門
界至得勝門樓止計一百二十餘丈復於得勝

門老月城內開掘深濠安設甕聽以杜轟塌之患復派兵勇縋城往焚文孝廟賊巢據生擒賊匪供稱江南賊匪尙有數千將至該逆又於永和得勝兩門外高坡上連紮三營分股在各門攻擾均經守陣兵勇開放槍礮擊退並不時選派兵勇下城追擊先後斃賊一百餘名生擒七十六名正法此五月二十一日至六月初一日

辦理守禦及擊賊之大概情形也參將羅玉斌
於二十八日帶兵來省江忠源與臣等密商派
令楚勇川勇九江鎮兵並已革臬司徐思莊督
糧道鄧仁堃所練各勇由城西順化門出隊分
三路進攻另派兵勇百餘名交守備封九貴督
帶由章江門下城往燒賊壘賊船江忠源督同
知府林福祥知縣馬永熾統帶練勇在城外高

處策應臣與在籍尙書臣陳孚恩在城上督陣
復派藩司陸元烺臬司惲光宸道員吳其泰鄧
仁堃王訓沈濤等分守各門三路兵勇將近賊
營該逆從營中施放大礮徐思莊練勇直撲賊
營該逆突出數千人練勇向前迎擊斃賊多名
因賊匪愈聚愈多經臣與臣陳孚恩在城督飭
知府耆齡遊擊祥麟看准賊隊各親點大礮轟

斃賊匪多名內有執黃旗賊目一名賊衆稍卻
復又回撲適九江兵楚勇川勇及南昌府勇三
面接應合力抵禦鏖戰二時之久將賊擊退守
備封九貴所帶兵勇由章江門下城各帶火罐
火箭欲焚賊壘賊船該逆突出二三百人冒死
抗拒兵勇奮力向前斃賊數十名遊擊常海在
城上督率浙江兵丁開放槍礮斃賊亦多此初

二日出城接仗之情形也惟兵力尙單攻勦未能應手又據湖口縣稟稱續到賊船百餘隻尤恐兇燄益熾現雖續募壯勇一二千人祇能幫同守陴於攻戰殊無把握卽省城可保無虞該逆必又竄往他處應請

飭催向榮及湖廣督撫撥兵前來但得精銳五千人卽可將此股賊匪撲滅不致再有蔓延

張芾又奏言六月初四日辰刻該逆果用地雷
於得勝門西月城外轟塌城牆六丈有餘逆匪
蠡擁而上當經臬司江忠源帶同伊弟江忠濟
督率楚勇首先擊退臣等及文武員弁卽飭兵
勇人夫等竭一晝夜之力趕緊搶築藉資保護
奏入

上命軍機大臣傳諭張芾曰逆匪圍撲南昌經該撫及

江忠源等督同官紳兵勇嬰城固守並屢次出城勦賊疊有斬擒賊鋒已挫其用地雷轟塌城牆亦經趕緊搶築惟賊情變詐百出仍須加意嚴防且現在有續到賊船百餘隻賊匪日增而守城兵勇相持日久又恐各有懈心向榮已派總兵音德布帶兵一千二百名於六月初七日起行前赴江西其湖南北各路援兵諒均不日可到該撫惟當激勵在事文武兵勇

竭力守禦援兵一到更可內外夾擊至現擾江西之賊首係何姓名賊衆究有若干是否洪逆分股抑係金陵遣散之楚匪另股分擾現有生擒賊黨著訊明具奏

上又命軍機大臣傳諭張亮基崇綸駱秉章曾國藩曰據張芾奏連日出城接仗斃賊多名惟兵力稍單攻剿未能應手亟須援兵協助著該署督撫等催令所

調將弁兵勇星速趨行卽抵南昌併力攻擊萬勿稍有延緩

上諭內閣曰逆匪攻撲南昌經張芾陳孚恩江忠源等督率兵勇絕城殺賊疊獲勝仗江忠源所帶楚勇尤能勇往出力江忠源著賞給白玉翎管一枝白玉四喜搬指一箇所有在事出力之文武員弁紳民兵勇著該撫覈實查明先行保奏以昭激勸

三十一日甲午李嘉端奏言賊船屢經上竄擄掠

米船亟應籌辦江防現今各州縣整頓鄉勇賊
來併力合剿並擬於州縣練勇內各選精壯三
四十人卽由該州縣籌備口糧合之可得二千
人再購求大礮十數座分守東西梁山但有陸
無水亦屬罔濟昨聞向榮催調廣艇由海赴援
可否仰懇

天恩飭令分撥數十隻配齊兵礮會同協守似於金陵
攻剿事宜亦有裨益再准琦善咨據獲賊供稱
江甯鎮江賊匪分撥一萬二千人前赴六合報
仇卽圖北竄囑臣於和州一帶設法防守查沿
江居民鮮有與賊爲難者大抵皆怵於報復之
說前者六合之事實快人心不圖果以報仇藉
口且欲由天長等處爲北竄之路此股賊匪如

在和州登岸卽可由全椒滁州北竄未必復折
而東恐所供六合報仇仍是聲東擊西詭計當
經飛咨都統雙成帶兵仍在滁州關山一帶嚴
守一面飛調緝匪有效之前署鳳陽縣黃元吉
帶領義勇就近由巢縣含山前往迎剿亦可兼
顧裕溪與李鴻章互相接應至固原兵六百五
十名已隨勝保北上追剿奏入

上命軍機大臣傳諭周天爵李嘉端曰江面時有賊船
乘間搶米接濟已諭向榮於粵東紅單船到江時提
赴上游與下游艇船合力夾擊惟該逆竄擾豫省撲
攻郡縣現經訥爾經額等分路擊剿將河北懷慶城
外之賊痛加剿洗河南許州之賊亦經柏山等擊退
餘黨由西平一帶逃竄難保不復行竄回皖省交界
防剿最關緊要周天爵現駐徐宿一帶設該逆竄至

附近地方必當竭力督勦並著李嘉端督同總兵王山迅撥兵勇扼守要隘

上又命軍機大臣傳諭琦善陳金綬雷以誠向榮許乃釗鄧紹良曰逆匪分踞三城屢次諭令該大臣等設法收復乃數月以來均以進攻未能得手爲詞恐被圍日久乘閒潛出聞該逆假冒官兵號衣希圖溷跡琦善向榮等頓兵城下於城內賊情虛實自必隨時

偵探但恐師老力懈竟令賊首潰圍而出又蹈從前覆轍至賊匪分撥一萬二千人前赴六合報仇之說亦不可不豫爲防範現在黃河南北股匪已屢被官兵擊敗其江南大股逆匪難保不續由江浦一帶北竄以爲豫匪接應總之江面不靖則逆匪得以往來自如防剿諸形棘手所有下游艇船得力者僅數十隻止能防其一面前調廣東紅單船此時諒已趕到

卽著向榮相機調赴上游扼要處所堵賊上竄之路
其下游一帶卽責成麟桂會同水路提鎮大員鄧紹
良等設法先將鎮江剋期收復其著名首逆如楊秀
青等是否已離江甯著向榮確切訪探卽一面嚴飭
鎮將奮力攻擊迅圖克復至江北要口前據琦善奏
稱已派瞿騰龍帶兵二千協同吉林官兵駐紮堵禦
著卽隨時督飭加意嚴防麟桂著仍督帶船礮會同

水師鎮將相機攻勦並可與鄧紹良隨時知照水陸夾攻毋庸移紮丹徒轉致不能兼顧

同日

上命軍機大臣傳諭台湧張亮基崇綸曰昨據陸應穀奏逆賊由河南許州竄至西平等處經該撫飭令總兵柏山等一路進剿河南與湖北接壤襄陽樊城地方尤扼形勝亟宜嚴密設防杜其竄擾將軍台湧現

已啟行來京陛見無論行抵何處著卽折回荊州探
明賊蹤如竄楚境卽著帶兵迎頭剿截並著張亮基
崇綸速飭襄陽一帶文武各員一體嚴防毋令賊匪
乘間竄入

上又命軍機大臣傳諭陸應穀曰昨據訥爾經額奏賊
偪懷慶經托明阿等剿殺一千餘名並殲斃僞丞相
吉汝元是河北之賊計日已可蕩平惟河南之賊由

許州南竄西平一帶急須跟蹤剿洗或繞前夾擊萬
不可任賊竄入鄰省遂爲了事皖楚各地方均與豫
省毗連本日已諭令荊州將軍及湖北安徽各督撫
一體嚴防著陸應穀卽督飭經文岱柏山王家琳等
迅速追剿乘賊喘息未定卽可一鼓殲除如餘匪竄
入皖楚各界卽飭該鎮等出境追擊並隨時飛咨鄰
省合力防剿毋誤事機

二十二日乙未向榮許乃釗奏言據提督鄧紹良

稟稱六月初九至十二等日該逆晝夜攻撲營盤均被官兵擊退斬獲甚多詎於十四日接據統帶四川官兵之副將瑞格遊擊周兆熊等稟報十三日賊匪突於焦山一帶將湖南及各處營盤盡行踏去瑞格等隨卽飛帶四川貴州官兵趕往接應賊已分股由都天廟前來打仗直

至酉刻賊方遁去我兵收隊回營惟所帶僅四
川兵一千名貴州兵五百名營盤偏近南門孤
軍難以久駐是以暗將營盤退紮馬陵請添兵
前來救援提臣鄧紹良現在丹徒鎮收集散兵
等語臣等查逆匪連日撲營均被官兵擊退各
營盤緊偏鎮城屯紮當不致漫無準備何以是
日一經賊匪攻撲輒被占踞營盤至焦山係在

大江之中賊由焦山突出尤不可解至鄧紹良
所帶湖南各兵旣退駐丹徒其四川貴州營盤
孤軍無援不能不退往馬陵駐紮查該處爲蘇
常門戶亟須勁兵往援方免搖動臣等派令總
兵和春統帶廣東兵一千五百名湖南兵八百
名馳往應援以固蘇常下游門戶提臣鄧紹良
駐鎮江日久未能克復咎已難辭乃並營壘亦

不能自固致被逆賊襲占實屬辜

恩溺職相應請

旨將江南提督鄧紹良先行革職治罪或仍留於軍營
效力贖罪至鄧紹良所帶弁兵銳氣已挫留於
鎮江亦屬無益應酌量撤回大營督飭各將弁
訓練振作以鼓其氣下游師艇各船一時無陸
路接應亦恐單薄仍責成總兵李德麟藩司麟

桂嚴督兵勇小心防範並咨會督臣怡良嚴飭
蘇常各屬文武會督紳士率同團練民勇一體
防範奏入

上命軍機大臣傳諭向榮許乃釗曰鄧紹良身膺專閫
付以克復重任應如何感奮圖報迅掃妖氛乃逆匪
撲營輒被占踞該提督平素尙屬勇敢何以如此潰
敗鄧紹良著先行革職留於軍營效力至焦山在大

江之中不通陸路該匪由何路衝來情形亦尙未確
仍著向榮許乃釗迅速查明因何失利據實叅奏其
將備各官下落著一併查明所有江南提督卬務卽
著和春暫行接署鎮江爲蘇常屏蔽不可稍有疏虞
該大臣派令和春統帶廣東官兵馳往應援著卽飭
令迅速督勦力圖克復其下游師艇各船卽飭令麟
桂李德麟嚴督兵勇相機進攻至金陵日久未復該

大臣現在如何布置傷首逆楊秀青竟自潛竄江西而以堅城牽掣我軍或因官兵圍困稍懈併力奔突而出急須加意防範設法攻剿毋再遷延玩泄

上又命軍機大臣傳諭怡良曰鄧紹良此次失利情形所報殊未明晰著怡良就近確切查訪據實覆奏四川等省官兵退往馬陵駐紮該處爲蘇常下游門戶所關緊要現經向榮派令和春督帶精兵前往援應

該城距大營較遠著怡良體察情形前往調度卽督率各提鎮及署藩司麟桂水陸進攻力圖克復並督飭蘇常文武紳民一體嚴防至江南大營糧臺本由江西支應現在南昌尙未解圍一時實難兼顧卽著怡良與許乃釗商酌於江蘇省就近支應仍飭彭玉雯熊鈺督率委員等妥速辦理

同日陸應穀奏言本月十一日該逆竄入遂平

縣城鎮臣柏山督兵緊追至城南五里大雨傾盆恐逆匪冒雨奔竄派兵由西北繞赴城南八里橋沙河以北分爲左右兩路埋伏大隊官兵卽乘夜圍繞城北一帶連放大礮該匪棄城南竄至沙河北岸時值河水暴漲賊不能渡我兵伏起槍礮並施鎮臣柏山一聞礮聲知賊匪已陷伏中隨督大隊官兵趕緊齊進登時殺斃長

髮賊二百餘名短髮賊三百餘名投河淹死者
無算僞丞相李姓亦爲我兵砍殺隨飭官兵進
城窮搜復擒斬數十人惟該匪等或鳧水渡河
或於未經接戰之先豫行偷渡亟應迅速追剿
時鎮臣經文岱業已趕至遂平遊擊全喜都司
蘇林亦各帶馬隊分投搜洗陸續獲賊二十餘
名當卽會同柏山渡河跟追至前河北鎮總兵

王家琳於十三日行抵西平之淤泥河因雨水
過大繞道行走高粱地內倏有賊匪三十餘人
持矛前撲王家琳左腰頓爲賊矛刺傷仍率千
總魁齡等殺斃賊匪二十餘人餘匪逃竄臣卽
飭令跟蹤追勦並派都司常啟雲等各帶練勇
分往村莊四路搜查鎮臣柏山督率將弁三次
獲勝實屬奮勇柏山應請

旨先行賞戴花翎其出力各員弁可否准 臣酌量保奏
以示鼓勵

陸應穀又奏言據遂平縣知縣劉鴻勳稟稱初
十日有賊股由西平一路直撲縣城該縣帶勇
迎頭堵截殺斃十餘名該匪退至城東張塘地
方正在攻圍間其大夥繞道由北門擁入城內
時南陽鎮臣柏山帶兵到縣該匪退出方欲渡

河被大兵殺斃無算十二日張塘之賊望南奔
逃該縣卽會同營員分投追剿適知縣趙曉趕
至隨同殺斃頭紮黃巾手執偽令逆匪查驗胸
前補服係春官正丞相五字十三日又在張塘
村外高粱地內殺賊二三十名搜獲腰牌四面
書寫副司馬等字樣均立時正法該縣失守城
池罪有應得惟旣經帶兵抵禦又復獲匪多名

並僞正丞相一名尙屬奮勉容 臣定案時再行
分別辦理奏入

上命軍機大臣傳諭陸應穀曰此次南竄之賊擾及遂
平經柏山督兵追剿殺斃不計其數必當乘此聲威
迅速追襲著該撫督飭柏山等速籌兜剿經文岱王
家琳與柏山同剿河南之賊何以經文岱趕至遂平
已在柏山得手之後且所帶遊擊全喜等僅搜獲賊

二十餘名該鎮究在何處逗留因何遲到王家琳行抵西平因雨繞道何以遇賊僅三十餘人卽被矛傷左翼豈該革員所帶兵勇尙不敵賊匪之數至因雨繞道亦不能任其藉口王家琳顯有畏縮退避之情著該撫訪查明確據實彙奏遂平縣知縣劉鴻勳因賊匪直撲縣城迎剿獲勝該匪退至張塘該縣復會營追剿並與汝甯委員一同殺賊功過尙足相抵著

該撫存記俟軍務告竣再行請旨惟該員所殺頭紮黃巾手執僞令逆匪查驗補服有春官正丞相字樣前據訥爾經額奏托明阿於懷慶殲斃僞丞相吉汶元一犯與向榮所遞逆書內春官正丞相吉汶元相符是該逆吉汶元已在河北伏誅何以遂平地方又有該逆號衣仍著該撫查明一併覆奏

上諭內閣曰逆匪竄入遂平縣城經柏山剿戮殆盡該

總兵奮勇直前三獲勝仗甚屬可嘉著加恩賞戴花翎其在事出力員弁並著陸應穀酌量保奏候朕施恩

同日張芾奏言逆匪於六月初四日用地雷轟塌得勝門西城牆當經臬司江忠源等督率楚勇擊退查所塌城垣除坐墊塌卸六丈有奇兩旁礮裂各三四丈當逆匪轟放地雷之時聲震

一城黑煙迷目該逆等蠶擁而上約數千人臣
等聞報趕至維時江忠源與伊弟江忠濟立即
督令楚勇奮力搶護該逆復用火箭槍礮向城
內施放子密如雨楚勇頭目唐邦興陳周呂等
站立缺口指麾衆勇冒死拒敵鏖戰一時殺賊
無數並斃身穿黃衣手執黃旗頭目數名賊方
少卻楚勇乘勢壓下該逆抵敵不住敗入屋內

楚勇林立城下拒住逆匪臣與陳孚恩督率文武員弁趕將缺口搶築高約七八尺始令楚勇撤回城內連夜修築至初五日將缺口及賊裂之處一律築補得以化險爲平當轟城時逆匪復分股攻撲各門經臣先派藩司陸元烺等暨已革臬司徐思莊戶部郎中陳景謨主事汪茹鑑等會同在城員弁在各門分段守禦均經嚴

督兵勇將各股逆匪一併擊退鄧仁堃林福祥
首先趕至缺口躬冒矢石督率槍築尤爲出力
合計是日各處約斃賊匪五六百人是役也首
先搶護之功楚勇爲最江忠源調度有方又能
先事豫防伊弟江忠濟不避鋒鏑督率楚勇首
先搶護洵屬勇敢至首先出力之楚勇及協同
卻敵各兵勇由臣分別從重給賞江忠源據稱

不敢仰邀議敘職員江忠濟可否請

旨賞給五品頂戴花翎出自

鴻慈應敘員弁勇目另繕清單恭呈

御覽惟是逆匪日聚日多詭謀百出此次轟塌城垣雖
經搶護而外援不至內困堪虞並聞該逆仍暗
挖地道尤須設法準備抵禦臣等惟督率在事
各員弁晝夜防守仍請

飭下向榮暨湖廣督撫迅將前調各兵星速來江援剿
以期迅解重圍

張芾又奏言查南康府濱臨鄱湖此次賊船竄
抵省城該府爲必由之路因無險可守以致被
賊蹂躪府城失守署知府恭安等據報業已殉
難應俟查明辦理彭澤湖口二縣所報督兵堵
禦情形亦難遽信現飭確查詳辦臣未能先事

豫防咎有應得應請

旨將臣從重治罪奏入

上命軍機大臣傳諭張芾陳孚恩江忠源曰此次賊匪
轟塌城牆乘勢搶撲該楚勇等能於倉猝之間奮勇
搶護俾城內得以趕緊修築而在城紳士徐思莊陳
景謨汪茹鑑等亦能會同文武分段守禦斃賊多名
均屬奮勇可嘉現在向榮所派音德布帶往赴援之

兵計日趕到本日張亮基奏已飭都司戴文蘭管帶
湖北兵一千名廣勇五百名川勇五百名星夜馳往
又據蔣爵遠奏已撥貴州兵二千名前赴湖南亦經
諭令張亮基卽將前調之湖南鎮筈鎮兵及湘鄉練
勇催赴江西合計援兵已不爲少該撫仍當會同陳
孚恩江忠源督飭兵勇激勵紳民一面設法守禦一
面出城夾擊以期迅解重圍另片奏南康失守及湖

口彭澤賊匪經過各情形前此張芾奏報賊撲省城之時朕卽疑沿途何以並無阻滯特降諭旨令查明沿江一帶有無失事今南康果有失守情事湖口彭澤兩縣雖據稟稱並未失守恐係飾詞稟報署知府恭安未有存亡確信著該撫卽行確查據實具奏該撫所請從重治罪之處著俟省城圍解後再降諭旨上諭內閣曰據張芾奏賊用地雷轟塌城牆經江忠源

等督率楚勇首先擊退是日首先搶護之功楚勇爲
最江忠源之弟江忠濟不避鋒鏑尤稱勇敢六品軍
功翎頂職員江忠濟著賞給五品頂戴並賞換花翎
袁州營都司景星著賞戴花翎浙江衢州營守備封
九貴著以都司儘先補用湖南藍翎守備李輔朝著
賞換花翎楚勇頭目唐邦興著以把總用並賞戴藍
翎陳周呂著賞戴藍翎李德極著以千總用並賞戴

藍翎楊賽川戴利行夏春潮均著以把總用朱維德
著以外委用仍著該撫會同陳孚恩江忠源督飭文
武員弁激勵紳民練勇迅將賊匪撲滅保衛省城遇
有出力尤著之員隨時查明先行保奏候朕施恩

同日張亮基奏言 臣前奉

旨令於道士湫黃石港兩處扼要防剿隨卽挑帶兵勇
前往沿途察看地勢道士湫南岸危峯陡起插

入江干水流湍急形勢甚險惟對面散花洲河
岸遼闊一遇伏秋盛漲江水瀾漫聯成一片江
面過寬難以控制黃石港江面七八里無險可
扼且兩處相距正近均係大冶地界設防於此
下游之黃梅廣濟興國三州縣不能兼顧縱能
固守江面陸路亦防不勝防惟廣濟之田家鎮
對面爲半面山壁立江心此處江流僅一百七

十餘丈稍上爲沙村對岸爲牛關磯江面雖寬較之他處猶爲窄狹且磯流駛急舟行逆水頗形艱阻臣躬親履勘擬於半面山對面田家鎮洲尾安設木筏大礮於洲上紮營深溝固壘以重兵鎮壓其閒似較道士湫黃石港兩處爲優至江西省城被圍兵勇僅五千餘名亟應分兵馳援而湖北據長江上游距賊較近現在到防

兵勇尙祇三千餘名臣於無可抽撥之中勉撥精壯兵勇千名又招集江南被賊衝潰之廣勇五百餘名川兵川勇五百名共二千餘名並歸都司戴文蘭統帶星夜由陸路馳赴江西聽候江忠源調遣都司戴文蘭人頗奮勇自廣西勦賊至湖南身經百數十戰江忠源亦深知其人臣復面加激勵可期得力又兵勇頗多戴文蘭

一人猶恐照料難周現在將備中差委實難其
人查有黃州副將張金甲上年賊陷武昌後黃
州兵潰曾經奏明查辦該副將失守城池罪有
應得臣見其人頗勇幹廢棄可惜現交戴文蘭
帶赴軍前效力併咨明江忠源如果該將尙知
愧奮殺賊立功再當奏懇

天恩量從末減或可稍收使過之效現據探報逆賊分

股由歸德竄撲開封省城並擾及鄭州河南府
一帶湖北與河南毗連各處捻匪最多自應豫
爲布置免致乘機勾結臣擬俟江防部署略定
交署漢黃德道徐豐玉前署漢陽府知府張汝
瀛接辦卽星夜回省籌辦北路事宜署提臣阿
勒經阿卽回襄陽本任加意準備奏入

命軍機大臣傳諭張亮基曰據稱廣濟縣之田家鎮

對面有半面山壁立江心江流最狹該署督擬於該處安設木筏大礮並可兼顧南北兩岸辦理尙屬得宜至南昌現尙被圍該省居閩浙皖楚之中其地最關緊要萬不可稍有疏虞該署督已分撥兵勇及招集廣勇等共二千餘名馳赴該省著卽趕緊催令星夜趲行毋稍遲延所請將副將張金甲帶赴江西著准其馳往軍前帶罪自效至襄陽樊城等處與河南

接壤卽著阿勒經阿隨同台湧加意準備嚴密設防
惟該署督現已回省署提督復回襄陽其下游江防
專責該署道府接辦仍著隨時體察情形相機策應
毋稍大意南陽鎮柏山追賊遂平連日大獲勝仗南
竄股匪計將殲除殆盡儻逆匪闖入湖北仍當迅速
堵擊蔣爵遠已選精兵二千名派得力鎮將帶赴湖
南現在計已到楚該省防堵之兵不至單薄前有旨

諭令調赴江西之鎮筸兵八百名湘鄉練勇數百名並著迅催星速援應南昌被圍情形萬分緊急專望兩楚援兵切勿延誤

同日貴州巡撫蔣霽遠奏言臣遵查黔省撫提兩標與鎮遠等鎮協營節次調兵六千餘名赴廣西湖南協剿除陸續撤回歸伍尙有二千六百五十餘名出師在外今奉

諭旨飭令黔省挑選精兵二千名赴湖南調遣臣會同
署提督臣趙萬春於提標所轄各協營挑選精
兵八百名安義鎮遠古州威甯四鎮與所轄各
協營內挑選精兵一千二百名共計二千名配
帶軍火器械遴派曾經出師之遊擊霍順武富
謙等分起管帶至統兵大員黔省副將內辦事
結實者俱已委署鎮篆其餘甚難其選惟查現

署古州鎮之威甯鎮總兵佈克慎前經出師得
力應請卽令該鎮統領前進臣已飛飭各帶兵
官迅速起程嚴加約束並派員護送出境奏入

報

聞